

ქალაქ ფოთის მუნიციპალიტეტის ტერიტორიაზე რეგისტრირებული ახალგაზრდებისთვის ახალგაზრდული ინიციატივების მხარდაჭერის დაფინანსების/თანადაფინანსების პროგრამის განხორციელების წესი

ეს წესი განსაზღვრავს ქალაქ ფოთის მუნიციპალიტეტის მერიის მიერ, ახალგაზრდული ორგანიზაციების იმ ახალგაზრდული ინიციატივების მხარდაჭერის დაფინანსების/თანადაფინანსების წესებსა და პირობებს, რომლებიც ვრცელდება ქალაქ ფოთის მუნიციპალიტეტის ტერიტორიაზე რეგისტრირებული ახალგაზრდებისთვის.

მუხლი 1. ზოგადი დებულებები

1. ქალაქ ფოთის მუნიციპალიტეტის ტერიტორიაზე რეგისტრირებული ახალგაზრდებისთვის, ახალგაზრდული ინიციატივების მხარდაჭერის განსახორციელებლად, ფინანსური ხელშეწყობის (დაფინანსება/თანადაფინანსება) პროგრამაში მონაწილეობის უფლება აქვთ ახალგაზრდული მიმართულებით მომუშავე ორგანიზაციებს.
2. აღნიშნული პროგრამის ფარგლებში დაფინანსებული/თანადაფინანსებული ინიციატივა უნდა განხორციელდეს ქალაქ ფოთის მუნიციპალიტეტში რეგისტრირებული ადგილობრივი/დევენილი ახალგაზრდების ჩართულობით.
3. ქალაქ ფოთის მუნიციპალიტეტის მერიის ახალგაზრდული ინიციატივების მხარდაჭერის ფინანსური ხელშეწყობის (დაფინანსება/თანადაფინანსება) პროგრამის განსახორციელებლად ქალაქ ფოთის მუნიციპალიტეტის მერიაში მერის ბრძანებით შექმნილია **ქალაქ ფოთის მუნიციპალიტეტის ტერიტორიაზე რეგისტრირებული ახალგაზრდებისთვის ახალგაზრდული ინიციატივების მხარდაჭერის დაფინანსებისა და თანადაფინანსების მუდმივმოქმედი კომისია**.
4. კომისია მოიწვევა საჭიროების შემთხვევაში კომისიის თავმჯდომარის მიერ.
5. კომისიის სხდომა უფლებამოსილია მიიღოს გადაწყვეტილება, თუ სხდომას ესწრება კომისიის წევრთა ნახევარზე მეტი.
6. დაინტერესებულმა პირმა განცხადება და მასზე დართული დოკუმენტაცია უნდა წარმოადგინოს ქართულ ენაზე, ხოლო უცხოენაზე შესრულებული დოკუმენტაცია თარგმნილი ქართულ ენაზე და დამოწმებული სანოტარო წესით.

მუხლი 2. პროგრამის მიზანი

1. პროგრამის მიზანია, ახალგაზრდული მიმართულებით მომუშავე ორგანიზაციებმა საკუთარ გამოცდილებაზე დაყრდნობით შეიმუშავონ ქალაქ ფოთის მუნიციპალიტეტის ტერიტორიაზე რეგისტრირებულ 14-დან 29 წლამდე ახალგაზრდებზე (ადგილობრივი/დევენილი) ორიენტირებული ინიციატივები. პროექტმა ხელი უნდა შეუწყოს ახალგაზრდული საქმიანობის განვითარებას და მუნიციპალიტეტში რეგისტრირებული ახალგაზრდების ინტერესებს.
2. ახალგაზრდული ინიციატივების მხარდაჭერის დაფინანსების/თანადაფინანსების პროგრამის ფარგლებში სამიზნე ჯგუფის მინიმალური ოდენობად სასურველია განისაზღვროს არანაკლებ 25 ახალგაზრდა.
3. კომისიაზე განსახილველად შეიძლება წარმოდგენილ იქნეს ინიციატივები, რომელიც ემსახურება:
 - ჯანსაღი ცხოვრების წესის პოპულარიზაციას;
 - გენდერულ თანასწორობის მიღწევას;
 - მრეწველობას და ინოვაციას;
 - ხარისხიანი განათლების ხელშეწყობას;

- ფოტო-მედია ხელოვნების პოპულარიზაციას;
 - ტურიზმის ხელშეწყობას;
 - დედამიწის ეკოსისტემის დაცვას;
 - ინკლუზიური და თანასწორი განათლების უზრუნველყოფას ახალგაზრდებისთვის;
 - მშვიდობიანი საზოგადოების ჩამოყალიბებას (მშვიდობის მშენებლობის ხელშეწყობა);
 - სხვა საქართველოში მოქმედი კანონმდებლობით დაშვებული აქტივობების განხორციელებას.
4. დასაფინანსებელი ინიციატივის პროექტი უნდა შეესაბამებოდეს საქართველოს ახალგაზრდული პოლიტიკის კონცეფციით გათვალისწინებულ მიზნებს და ამოცანებს.

მუხლი 3. ქალაქ ფოთის მუნიციპალიტეტის მერიის ახალგაზრდული ინიციატივების მხარდაჭერის ფინანსური ხელშეწყობის (დაფინანსება/თანადაფინანსება) კრიტერიუმები

1. ქალაქ ფოთის მუნიციპალიტეტის მერიის ახალგაზრდული ინიციატივების მხარდაჭერის ფინანსური ხელშეწყობის (დაფინანსება/თანადაფინანსება) პროგრამაში მონაწილეობის მისაღებად დაინტერესებული პირის მიერ წარმოდგენილი უნდა იყოს:

- 1.1 განცხადება მერის სახელზე;
 - 1.2 საინიციატივო/საპროექტო განაცხადი (ინფორმაცია ორგანიზაციის შესახებ, შევსებული სააპლიკაციო ფორმა, ბიუჯეტის ფორმა და განხორციელების გეგმა);
 - 1.3 სხვა დოკუმენტაცია, რომელიც წარმოაჩენს ინიციატივის დაფინანსების საჭიროებას;
 - 1.4 განმცხადებელი ორგანიზაციის ამონაწერი საჯარო რეესტრის ეროვნული სააგენტოდან;
 - 1.5 განმცხადებლის პირადობის მოწმობის/დაბადების მოწმობის ან პასპორტის ასლი;
 - 1.6 სახელმწიფო სერვისების განვითარების სააგენტოდან საინფორმაციო ბარათი/დევენილის შემთხვევაში, ცნობა რეგისტრაციის შესახებ.
 - 1.7 თუ ინიციატივა/პროექტი დაგეგმილია არასრულწლოვანი პირების მონაწილეობით, ასევე თუ ის ხორციელდება ქალაქ ფოთის მუნიციპალიტეტის ფარგლებს გარეთ, ინიციატივის ავტორი ვალდებულია წარმოადგინოს არასრულწლოვანი მონაწილეების მშობლების/კანონიერი წარმომადგენლის ნოტარიულად დამოწმებული თანხმობა.
 - 1.8 განმცხადებელი ორგანიზაციის საბანკო რეკვიზიტები.
2. კომისიაზე განსახილველად წარმოდგენილი ინიციატივა უნდა შეესაბამებოდეს საინიციატივო პროექტის შედგენისთვის დადგენილ სტანდარტებს.
3. მერიის მიერ წარმოდგენილი ინიციატივის/პროექტის დაფინანსება/თანადაფინანსება უნდა გახორციელდეს არანაკლებ 1000 (ათასი) და არაუმეტეს 9 000 (ცხრა ათასი) ლარით.
4. 4000 (ოთხი ათასი) ლარზე მეტი ღირებულების ინიციატივების/პროექტების შემთხვევაში მერია განხორციელებს თანადაფინანსებას, რომელიც არ უნდა აღემატებოდეს ინიციატივის/პროექტის სრული ღირებულების 80 %-ს.
5. დაფინანსებული/თანადაფინანსებული ინიციატივის/პროექტის ბიუჯეტის ნაწილში ჰონორარის ჯამური თანხა არ უნდა აღემატებოდეს, მერიის მიერ დაფინანსებული წილის 20 %-ს.
6. ინიციატივის/პროექტის დაფინანსების/თანადაფინანსების შემთხვევაში თანხის ჩარიცხვა განხორციელდება კანონმდებლობით დადგენილი წესის შესაბამისად.

მუხლი 4. პროგრამის ფინანსური უზრუნველყოფა

1. პროგრამის ფინანსური უზრუნველყოფა ხორციელდება ქალაქ ფოთის მუნიციპალიტეტის ბიუჯეტით (სპორტული და ახალგაზრდული ღონისძიებების პროგრამა; პროგრამული კოდი: 050102)
2. პროგრამის ფინანსური უზრუნველყოფა განხორციელდება ორ ეტაპად. პირველ ეტაპზე, განმახორციელებელს გადაერიცხება თანხის ნაწილი, არაუმეტეს 50 %-ისა, ხოლო შუალედური ანგარიშის წარდგენის შემდეგ კი დაფინანსებული/თანადაფინანსებული თანხის დარჩენილი ნაწილი.

3. კომისიაზე განსახილველად წარმოდგენილი ინიციატივის შინაარსის, მიზნებისა და განსახორციელებელი აქტივობების გათვალისწინებით კომისიას შეუძლია იმსჯელოს ინიციატივის/პროექტის განმახორციელებელი ორგანიზაციისათვის თანხის 100%-ის ოდენობით ჩარიცხვაზე.

მუხლი 5. პროგრამის ადმინისტრირება და მონიტორინგი

1. პროგრამის ადმინისტრირებას უზრუნველყოფს ქალაქ ფოთის მუნიციპალიტეტის მერიის კულტურის, განათლების, ძეგლთა დაცვის, სპორტისა და ახალგაზრდულ საქმეთა სამსახურის ახალგაზრდულ საქმეთა განყოფილება, რომელიც ამოწმებს წარმოდგენილი განცხადების შესაბამისობას მოქმედ კანონმდებლობასა და ამ წესთან.

2. განმცხადებელის მიერ ამ წესით განსაზღვრული დოკუმენტაციის არასრულყოფილად წარმოდგენის შემთხვევაში, ქალაქ ფოთის მუნიციპალიტეტის მერიის კულტურის, განათლების, ძეგლთა დაცვის, სპორტისა და ახალგაზრდულ საქმეთა სამსახურის ახალგაზრდულ საქმეთა განყოფილება ხარვეზის აღმოსაფხვრელად განმცხადებელს განუსაზღვრავს გონივრული ვადას არაუმეტეს 10 სამუშაო დღის ოდენობით. აღნიშნულ ვადაში თუ დაინტერესებული პირი არ წარმოადგენს მოთხოვნილ დოკუმენტაციას, ქალაქ ფოთის მუნიციპალიტეტის მერია უფლებამოსილია მიიღოს გადაწყვეტილება განცხადების განუხილველად დატოვების შესახებ.

3. ამ წესთან და მოქმედ კანონმდებლობასთან შესაბამისი განცხადებები და მასზე დართული დოკუმენტაცია განსახილველად წარედგინება ქალაქ ფოთის მუნიციპალიტეტის ტერიტორიაზე რეგისტრირებული ახალგაზრდებისთვის ახალგაზრდული ინიციატივების მხარდაჭერის დაფინანსებისა და თანადაფინანსების მიზნით შექმნილ მუდმივმოქმედი კომისიას.

4. კომისია უფლებამოსილია, მიიღოს გადაწყვეტილება თუ მას ესწრება კომისიის წევთა ნახევარზე მეტი. კომისია განცხადებებს განიხილავს სხდომაზე და გადაწყვეტილებებს იღებს ღია კენჭისყრით, ხმათა უმრავლესობით.

5. კომისიაზე დგება სხდომის ოქმი, რომელსაც ხელს აწერს სხდომაზე დამსწრე ყველა წევრი.

6. კომისიის სხდომას უნდა ესწრებოდეს განმცხადებელი ან მისი უფლებამოსილი წარმომადგენელი და მოახდინოს ინიციატივის/პროექტის პრეზენტაცია ან საჭიროების შემთხვევაში წარმოადგინოს დამატებითი დოკუმენტაცია.

მუხლი 6. ახალგაზრდული ინიციატივების მხარდაჭერის დაფინანსება/ თანადაფინანსების შესახებ გადაწყვეტილების მიღება

1. ინიციატივის/პროექტის დაფინანსება/თანადაფინანსება ხორციელდება კომისიის გადაწყვეტილების საფუძველზე ქალაქ ფოთის მუნიციპალიტეტის მერიის ბრძანებით.

2. ახალგაზრდულ ორგანიზაციას შესაძლებლობა ექნება წელიწადში არაუმეტეს ერთხელ მომართოს ქალაქ ფოთის მუნიციპალიტეტის მერიას ახალგაზრდული ინიციატივების მხარდაჭერის დაფინანსების/თანადაფინანსების მოსაპოვებლად.

მუხლი 7. ანგარიშის წარდგენა

1. განმცხადებელი ვალდებულია წარმოადგინოს შუალედური და საბოლოო ანგარიში თანხის გახარჯვის შესახებ და მასთან ერთად აქტივობების ამსახველი ფოტო-ვიდეო მასალა და მონაწილეების სარეგისტრაციო ფორმა;

2. დაფინანსება/თანადაფინანსების შემთხვევაში ინიციატივის ავტორი/ უფლებამოსილი პირი ვალდებულია პროექტის დასრულების შემდეგ წარმოადგინოს თანხის მიზნობრივად გახარჯვის ამსახველი დოკუმენტაცია და განხორციელებული ინიციატივის/პროექტის პრეზენტაცია პროექტის შესრულებიდან არაუგვიანეს 1 თვის ვადაში.

3. დაფინანსებული/თანადაფინანსებული ინიციატივის/პროექტის მონიტორინგს განხორციელებს ქალაქ ფოთის მუნიციპალიტეტის კულტურის, განათლების, ძეგლთა დაცვის, სპორტისა და ახალგაზრდულ საქმეთა სამსახურის ახალგაზრდულ საქმეთა განყოფილების მიერ შექმნილი ინსპექტირების ჯგუფი ან/და ქალაქ ფოთის მუნიციპალიტეტის ტერიტორიაზე რეგისტრირებული ახალგაზრდებისთვის ახალგაზრდული ინიციატივების მხარდაჭერის დაფინანსებისა და თანადაფინანსების მუდმივმოქმედი კომისიის მიერ სხდომის ოქმით განსაზღვრული ინსპექტირების ჯგუფი.

მუხლი 8. ცვლილებები და დამატებები

1. ქალაქ ფოთის მუნიციპალიტეტის ტერიტორიაზე რეგისტრირებული ახალგაზრდებისთვის ახალგაზრდული ინიციატივების მხარდაჭერის დაფინანსების/თანადაფინანსების პროგრამის განხორციელების წესში ცვლილებებისა და დამატებების შეტანა შესაძლებელია კომისიის წევრთა ხმათა უმრავლესობით, მოქმედი კანონმდებლობის შესაბამისად.